



REPÚBLIKA DEMOKRÁTIKA TIMÓR-LESTE
GABINETE PRIMEIRU-MINISTRU

ALOKUSAUN
SUA EXELÊNSIA PRIMEIRU-MINISTRU
KAY RALA XANANA GUSMÃO NIAN
IHA OKAZIAUN SERIMÓNIA TRANSFERÊNSIA RESPONSABILIDADE
EZEKUTIVA HUSI UNPOL BA PNTL IHA SENTRU FORMASAUN POLÍSIA
NIAN

11 Setembru 2009

Dili

Exmu. Senhór Sekretáriu Estadu Seguransa, Dr. Francisco Guterres,

Exmu. Senhór Komandante-Jerál PNTL, Komisáriu Longuinhos Monteiro,

Exmu. Senhór 2º Komandante-Jerál PNTL nian, Komisáriu Afonso de Jesus,

Exmu. Senhór Representante Sekretáriu-Jerál ONU, Dr. Atul Khare,

Exmu. Senhór Komandante Polísia Nasoens Unidas, Superintendente Xefe Luís Carrilho,

Exmus. Senhores Representantes Korpu Diplomátiku,

Distintus konvidadus

Ofisiais, Sarjentus no Ajentes PNTL,

Besik halo tinan tolu mak titulares Órgauns Soberania ne'ebé harí bazeia ba Konstituisaun, hanesan Prezidênsia Repúblika, Parlamentu Nasionál no Governu, tanba la iha dalan seluk, mak tenke

husu ajuda husi rai li'ur hodi nune'e bele asegura nafatin orden públika no seguransa ba populusaun tomak.

Tanba ita nia Polísia sei frájil hela, no hatudu ona katak la iha kbiit atu garante kondisoens seguransa ne'ebé presiza tebes hodi asegura ba sosiedade timorensa tomak moris pasífika no ordeira, maka ba tempu badak ita tenke abdika ka husik lai parte importante husi ita nia soberania rasik.

Tanba ita nia salan rasik ita obrigadu entrega ba Nasoens Unidas, liuhusi nia Polísia, mak UNPOL, responsabilidade ezekutiva kona-ba seguransa interna Timór-Leste nian, hodi husik elementus forsas seguransa husi rai li'ur mai substitui fali ita nia polísia sira.

Desizaun ida ke todan tebes, maibé presiza halo. Ita la iha dalan seluk, tanba iha tempu ne'ebá, buat ne'ebé fundamentál liu, maka oinsá bele tau matan ba seguransa populusaun tomak nian no sira nia rikusoin, i hanesan konsekuênsia garante mós Estadu ne'e rasik nia sobrevivênsia ka moris naruk.

Ho tempu mak ita bele haré katak ita iha duni razaun. Tanba intervensaun rápida husi paizes amigus sira, ne'ebé lailais tebes sira konsege hatún sira nia forsas seguransa no defeza iha rai timór, hafoin, Nasoens Unidades mós prontu simu fali nia responsabilidade atu garante seguransa interna País ne'e nian, maka bele harí metin nafatin aliserses Estadu,

liuhusi funcionamentu instituisoens Estadu tomak no regulár ezersísiu direitus elementares sidadauns hotu nian.

Situasaun oras ne'e sai seluk ona, la hanesan tempu krize iha tinan 2006 no 2007. Timór-Leste moris daudaun ona iha períodu ida ne'ebé estabilidade sosiál, ekonómika no polítika metin tebes ona, hanesan prova ita bele haré ba kresimentu iha investimentu públiku no privadu, internu no externu, ho vizaun atu garante kondisoens moris ne'ebé diak liután ba Povu tomak.

Faktu ida ne'e la sés husi esforsu maka'as ne'ebé Governu ne'e halo, depoisde simu pose, tanba hakarak rezolve lailais problemas ne'ebé afeta seguransa País hodi nune'e bele kria kondisoens ba nia desenvolvimentu progresivu.

Ha'u bele destaka, entre sira seluk, kazu rebeldes armadus sira, ne'ebé hakarak hodi biit dezafia autoridade Estadu no buka uza métodos ilejítimus atu hatún podér ne'ebé eleitu demokratikamente; kestaun seluk mak kona-ba petisionáriu sira, ne'ebé mosu tanba dada naruk fali solusaun ida ke justa no loloos nian, hodi estraga koezaun no disiplina Forsas Armadas nian; no injustisa sosiál boot tebes ne'ebé mosu iha kampus dezlokadus, katak timór-oan barak mak la moris ho dignidade tanba la iha kondisoens atu moris nu'udár ema.

Ita agora bele moris hakmatek no iha seguransa. Iha lurón no estradas ne'ebé komesa hadi'a daudaun no ahi mós lakan nabilan, ita hotu bele sirkula ka la'o avontade, no ita bele sente katak ita nia autoridades ka na'i ulun boot sira hamutuk ho ita.

Ha'u hanoin justu, katak ha'u tenke agradese no rekonhese papél di'ak ne'ebé ema hotu hala'o liu-liu sira ne'ebé mai tulun ita, ein-partikulár Nasoens Unidas no nia Polísia, tanba se la fose sira, ita sei la hetan páz sosiál ne'ebé ohin loron ita goza.

Maibé la'ós ita nia sociedade mesak mak muda sai di'ak liu: PNLT mós organiza fali ona nia an i agora preparada no kapasitada atu simu fali nia funsoens tomak. Nia liuhusi restruturasaun interna ne'ebé kle'an tebes, ho objetivu atu oinsá bele aumenta kapasidade operasionál no hametin espíritu de-korpu.

Lei Orgânica PNLT nian foun, bele responde ona maioria ema sira ne'ebé serve iha instituisaun nobre ida ne'e laran, nia hakarak. Kadeia de-komandu, ierarkia no disiplina sai hanesan vértise ka pontu kulminante Polísia foun ne'e nian, hodi hametin liután koezaun no espíritu de-korpu.

To'o ona oras atu PNLT simu fali responsabilidade atu garante seguransa interna País ne'e nian. Ne'e prosesu ida ke hala'o tuir fazes, hahú iha fulan Junhu liubá ho

transferênsia responsabilidade husi UNPOL ba PNTL iha Komandu Distritál Lautém, tuir mai iha Oe-Kuse no Manatutu.

Ho laran haksolok no orgulhu mak ha'u deklara katak ita nia polisia sira iha Distritus hirak ne'ebé foin daudaun temi, responde di'ak tebes ba ema nia expetativas, no bele hala'o ho briu ka korajen,

altu sentidu du-devér, efikasía no efisiênsia, knaar tomak ne'ebé sira hasoru.

Loron ohin hanesan marku imporante ida ba istória PNTL nian: Sentru Formasaun Polisia mak primeira Unidade PNTL nian ne'ebé, maski la'ós hanesan Komandu Distritál, bele depende ona ba nia an-rasik no responde diretamente ba Komandante Polisia Timór-oan.

Sentru Formasaun Polisia hanesan Unidade bersu ka fatin moris PNTL. Ofisiais, sarjentus no ajentes sira hotu liuhusi ne'e, no hahú husi ne'e sira nia karreira nu'udár mane ka feto ne'ebé halo servisu ba kauza seguransa públika. Sira nia perkursu ka karreira profesionál, durante vida tomak, depende barak tebes ba konhesimentus ne'ebé hetan husi ne'e.

Formasaun hanesan pilár ba ajente autoridade hotu-hotu. Tanba ne'e mak Estadu iha obrigasaun atu investe parte importante husi nia rekursus ba formasaun polisia sira. Ida ne'e mak Governu hakarak halo!

Ita adopta modelu polisia nian ida ne'ebé la hanesan ho ida ne'ebé ita sei uza to'o fulan hirak liubá. Kaer nafatin ba prinsípius orientadores hanesan polisia komunitária iha filozofia polisiamentu, ita hanoin katak di'ak liu fó mós ba ita nia Polisia natureza ida ne'ebé idêntika ka hanesan militar nian, iha nia valênsias ka komportamentu hanesan organizasaun, estatutu pesoál, disiplina no instrusaun.

Realidade foun ida ne'e nian halo be tenke iha mudansa kle'an boot tebes iha prosesu formasaun ba mane ka feto sira hotu ne'ebé hakarak tuir karreira servisu ba forsas seguransa.

Formasaun ho treinu PNTL nian la bele halo tuir ona moldes ne'ebé uluk utiliza, hanesan uza formadores husi paizes oioin, ho idaidak nia modelu polisia, ne'ebé kria situasaun ida ke la garante unidade de-doutrina.

Tanba razaun hirak ne'e hotu, Governu halo ona kontaktus ho paizes maluk balu, liu-liu ho hirak ne'ebé sira nia forsas seguransa ita nia Polisia agora banati tuir, atu nune'e formasaun ba membrus PNTL hala'o tuir âmbito kooperasaun bilaterál.

Imperativu katak instrusaun bázika ne'e kargu Polisia mesak ida nian, maibé la prejudika kontributus sira seluk ne'ebé bele hetan iha áreas especializadas.

Ofisiais, sarjentus no agentes Sentru Formasaun Polisia, agora imi simu responsabilidade boot ida iha imi nia kabás. La'ós de'it atu kaer destinus Eskola ne'e nian. Importante liu mak dezafius foun ne'ebé hein hela imi, tanba imi rasik mak sei hanesan mentores ba ema hotu ne'ebé hahú ohin ba oin, sei uza farda PNTL nian.

Ita nia Polisia nia dezempenhu iha futuru sei depende ba formasaun ne'ebé hala'o iha ne'e. Empenhu ho profesionalizmu boot husi kamaradas internacionais sira ne'ebé mai ajuda imi, ne'e seidak to'o.

Depende mós, i barak liu, ba kapasidade husi formadores timór-oan rasik, ne'ebé tanba sira nia experiênsia i kompetênsia ne'ebé hatudu ona durante sira nia karreira naruk hanesan polisia, mak hili sira atu mai hanorin iha ne'e.

Ha'u ezorta ka apela ba imi atu serve imi nia Instituisaun ho imi nia matenek no dedikasaun tomak.

Ha'u dezeja ba imi hotu felisidades boot tebes no êzitus profisionais iha imi nia servisu ba Polisia no ba Pátria.

Obrigadu barak!